

Yeets kuu mkee Paba lo re zha yez Roma

Paba mni “diox” lo re zha yez Roma

¹ Na nak Paba ne ngetsow'n rtsin Jesucrist. Ngekeen yeets ree lo re goo, tak Diox mlin ne mrez'n par nak'n apóstl chaan Jesucrist, ne mtaal Diox'n tsa tan kwent Diiz Chul chaan Diox.

² Ndala nzhab Diox re diiz ree lo re men por roo re profet chaan Diox, ne mkee re profet re diiz ree lo xkeets Diox. ³ Diiz ree ndaa kwent chaan Xgann Diox kuu myaad ngok men, ne lo raz chaan David ngol Xgann Diox, ⁴ lee Mbi Nayon chaan Diox mteroban Jesucrist lo yalguth kon yalney, koree mlloo lee Jesucrist nak Xgann Diox, ne lee Jesucrist nak Zha Nabee lo'aa.

⁵ Ne por lee Jesucrist mlloo Diox yalnkelaaaz chaan Diox lo'aa. Ne por lee Jesucrist mkayaa nee yalnabee lo Diox par nak nee apóstl, tsa taa nee kwent xkiiz Diox lo re zha kuu nagt zha Israel, tsa yelaaz re zhay ne gon zha diize. ⁶ Ne xid re zha'a nzo re goo, zha kuu nak zha yez Roma, kona mrez Jesucrist goo, tsa gak goo zha Jesucrist. ⁷ Lo reta goo zha yez Roma nin, kwathoz nke leettsoo Diox goo, kona mli Diox goo, tsa gak goo zha nali lo Diox. Nlaz'n lee Xutaa Diox ne Jesucrist Zha Nabee lo'aa, loo yalnkelaaaz chaan lo re goo ne tsow wen kwín goo.

Paba nlaaz ya yez Roma

⁸ Kuu ner ntsow'n nak, ndan texkix lo Diox kon yalnabee chaan Jesucrist, ne naab'n lo Diox por reta goo, tak reta ta ndediz wen re men xa nyelaaz goo Jesucrist. ⁹ Ne kon dib ndroo leettsoon nkeen tsiin lo Diox, ndan kwent Diiz Chul chaan Xgann Diox, ne lee Diox ne, gandata wiz naab'n lo Diox, tsow Diox ayud goo. ¹⁰ Ne thibka naab'n lo Diox yal'n lo goo, os lee Diox nlaaz Diox tsa yal'n lo goo. ¹¹ Kwathoz nlaz'n yal'n lo goo, tsa tsow'n ayud goo, tsa masraa ney to goo lo Diox. ¹² Ne tsa thibka yo ney leettsoo'aa, tak nyelaazaa Jesucrist.

¹³ Re goo wets'n ne btan na, nlaz'n ne goo tyen welt ngwalaz'n gayal'n lo goo, tak nlaz'n wiin re kuu wen kuu ngetsow goo, taxal ntsow tedib net re zha kuu nagt zha Israel. Per kwathoz kuu ntow lon ta mod terka yatwiin naa ma goo. ¹⁴ Ne kwathoz nda leettsoon, tak ter tan kwent xkiiz Jesucrist lo re zha kuu ndediz diiz gryeg ne lo re zha kuu ndedizte, lo re zha nzhaak ne lo re zha kuu gagt. ¹⁵ Kona kwathoz nlaz'n yal'n lo re goo zha yez Roma, tsa tediz'n Diiz Chul chaan Diox lo re goo.

Yalney chaan Diiz Chul

¹⁶ Nthoyt'n ndan kwent Diiz Chul, tak leey nak yalney chaan Diox, ne por Diiz Chul koo Diox reta zha kuu nyelaaz Jesucrist lo yalguth, ner ner re tawlaz'n zha Israel, tsaraa re zha kuu nagt zha Israel. ¹⁷ Ne Diiz Chul ree nloo naa xomod ntsow Diox nzhak nali'aa lo Diox, tak nyelaazaa Jesucrist, taxal nzhab lo xkeets Diox: "Lee zha kuu nali ndo lo Diox, tak nyelaaz zha Diox, kona taban zha". [Hab. 2:4]

Re kuu went kuu ntsow re men

¹⁸ Desde yibaa ndyaadla yalnayii chaan Diox, dits reta zha kuu ntsow kuu went, re zha kuu nalit ndo lo Diox, por re kuu went kuu ntsow zha, tak nlaazt zha yelaaz tedib net re zha kuu wli. ¹⁹ Tak reta zha ne zha ne nlebee zha naa cho nak Diox, tak leeka lee Diox mloo Diox naa cho nak Diox lo zha, tak leeka Diox mloo Diox lo re zha. ²⁰ Nloot Diox, per kwathoz wen nloo naa cho nak Diox lo reta men, por reta kwaa mdexkwaa Diox. Tak desde leettsa mdexkwaa Diox yezlyu, mloo Diox naa cho nak Diox, mloo Diox kwathoz ney Diox ne mloo Diox nambi nak Diox. ;Kona lee re zha kuu ntsow kuu went, yent kwan kuu kelo zha lo Diox, leettsa naab Diox kwent lo zha! ²¹ Tegal ne'a zha naa cho nak Diox per ngwalaazt zha Diox, mtsow nataagt zha Diox ne neeka mndaat zha texkix lo Diox, leel ngok naxen yek re zha, ngok nad leettsoo zha ne thitanax mkow yek zha. ²² Tegal mbez zha kwathoz nzhaak zha, per leel ngok bxen zha, ²³ tak mtsee zha Diox kuu kwathoz wen nak, Diox kuu thitanax nzhatht, por re diox kuu nyelaaz re men kuu na taxal thib men, taxal maa kuu ndob xiil, taxal re maa kuu ndob thap nii, ne taxal re maa kuu ndedoob lo yu, ne reta koree nzhatht.

²⁴ Kona mlaa Diox zha, tsa tsow zha re kuu went ne re kuu yu kuu nlaaz kwerp zha, re kuu ndoblo thoy zha tsow zha. ²⁵ Tak mtsee zha re kuu wli chaan Diox por re kuu wlit, ne mtsow nataak zha re kuu mdexkwaa Diox ne nzhoon zha loy, per mtsow nataagt zha Diox ne neeka mbilt zha lo Diox kuu wen nak, Diox kuu mdexkwaa reta

kwa, Dio kuu ndoblo gol men lo thitanax. ¡Tata gake!

²⁶ Kona thitanax mlaa Dio zha, tsa mtsow zha reta kuu nlaaz kwerp zha, re kuu ndoblo thoy zha tsow zha. Asta re ngot mlaa ngot nzhak ropt raa ngot kon tsaal ngot, leel nzhak rop ngot leeka rop tagot ngot. ²⁷ Ne leeka tata ntsow re mbyi, nzhak ropt raa zha kon tsaal zha. Sinke ngoo yek zha ntsow zha reta kuu went kuu nlaaz kwerp zha, nzhak rop zha kon leeka tabyi zha, thib kuu thitanax went. Ne re koree ntsow kwathoz ndriid zha yalti ne ndroo yalnathoy zha, por re kuu went kuu ntsow zha.

²⁸ Ne tak nlaazt zha lebee zha Dio, kona thitanax mlaayaa Dio zha, tsa tsow zha loka kuu nlaaz zha, re kuu ndoblolot zha tsow zha. ²⁹ Ne ngok zha:

zha kuu nalit nak,
ngok zha zha went,
ndablaaz zha reta kwa,
ntsin leetsoo zha kuu went,
ndablaaz zha chaan taben zha,
nzhuth zha taben zha,
nkwaan zha zhoo,
nkedi zha,
nakap nak zha,
ndediz zha diiz yizh.

³⁰ Nlooz zha taben,
nayii zha ne zha Dio,
ndak zha nataagt tedib men lo zha,
ntsow nataak zha leeka lee zha,
ndrub zha,
ngab re kuu went yek zha,
nzhont zha diiz lo xut zha ne lo xnaa zha.

31 Yent kwan nyen zha,
legalt zha,
nket leetsoo zha ne nlatta leetsoo zha ne zha
taben zha.

32 Ne tegal wen ne zha lee Diox nzhab: “Loka zha
kuu ntsow re koree ndoblo zha gath zha”. Ne
leel masraa ntsow zhay, ne wen nyoo leetsoo zha
ngwii zha re zha kuu ntsow re kuu went ree.

2

Nali naab Diox kwent

¹ Leetssa nkeki'aa tabenaa, nkeki'aa leeka
lee'aa, tak nye leetsoo'aa nloozaa ne nkeki'aa
tabenaa, ne si leeka kuu ntsow tabenaa ntsowaa;
kona yent kwan kelo'aa kabaa lo Diox, leetssa
naab Diox kwent lo'aa. ² Per ne'a nali naab Diox
kwent lo re zha kuu tata ntsow. ³ Kona, ¿kwan
ntsow goo xgab? Leetssa nkeki'aa tabenaa ne
ntsowaa leeka kuu ntsow tabenaa, ¿chu ntsow
goo xgab, tak laa'aa lo yalnayii chaan Diox? ⁴ ¿Chu
ndak goo nataagt yalwen chaan Diox lo'aa ne chu
ndak goo nataagt xa nkek leetsoo Diox ne Diox
re'aa? Ndoblo yen goo lee yalnkelaaaz chaan Diox
nak kuu ntsow, nlaa'aa re kuu went ne nyelaazaa
Diox. ⁵ Ne tak nayeze yek goo, kona nlaazt goo
yelaaz goo Diox, kona masraa ngetsib goo yalnayii
chaan Diox dits goo, leetssa tsin wiz kuu nali naab
Diox kwent lo reta men, ⁶ ne tsya kix Diox lo reta
men taxalta kuu mtsow men. ⁷ Re zha kuu thibka
ntsow kuu wen, nkwaan zha tsa wen ne Diox zha,
nkwaan zha xni chaan Diox ne nkwaan zha taa
Diox yalnaban kuu thitanax lo zha. ⁸ Per lee re
zha kuu nkwaan byo ne kuu went, re zha kuu
ndaat yek gon kuu wli, re zha kuu ndeke dits kuu

wlit, Diox naab kwent lo re zha'a ne teteti Diox re zha'a. ⁹ Lee yalnayii chaan Diox la dits reta zha kuu ntsow kuu went, ne kwathoz nalatt rid re zha'a. Ne ner ner re tawlaz'n zha Israel ne noga re zha kuu nagt zha Israel. ¹⁰ Per lee re zha kuu ntsow kuu wen, wen wii Diox lo zha, tsow nataak Diox zha ne tsow Diox wen kwin zha kon Diox. Ner ner lo re tawlaz'n zha Israel tsow Diozhe ne noga lo re zha kuu nagt zha Israel.

¹¹ Yegwal naab Diox kwent lo reta men, tak yegwal nak reta men lo Diox. ¹² Lo reta zha kuu napt ley kuu mndaa Diox lo re nee zha Israel, teteti Diox re zha'a por re kuu went kuu mtsow zha. Ne reta nee zha Israel kuu nap ley kuu mndaa Diox lo nee, Diox naab kwent lo nee taxal nzhab lo ley kuu mndaa Diox lo nee. ¹³ Ne nagt tak nzhon zha kuu nzhab lo ley kona kayaa Diox zha taxal zha nali, sinke re zha kuu nzhon diiz re kuu nzhab lo ley, re zha'a kayaa Diox taxal zha nali. ¹⁴ Ne leettsa lee re zha kuu nagt zha Israel, ntsow zha taxal nzhab lo ley kuu mndaa Diox lo nee, tegal napt zha leya, per kona nak taxal nap zha ley chaan Diox leen leettsoo zha. ¹⁵ Tak lo re kuu ntsow zha nloo nap zha ley leen leettsoo zha. Ne leeka leettsoo zha ne xgab zha nloo lo zha, tsa ne zha naa chu ngetsow zha kuu wen o kuu went. ¹⁶ Asta wiz kuu to Diox Jesucrist tsa naab Jesucrist kwent reta kuu xgaats kuu ntsow reta men, taxal nak Diiz Chul kuu ndan kwent.

Re zha kuu wlipaa nak zha Israel

¹⁷ Os lee goo mbez goo nak goo zha Israel, ne nyelaaz goo kuu nzhab lo ley kuu mndaa Diox lo Moisés, ne ndrüb goo mbez goo zha Diox nak goo.

18 Ne wen ne goo naa kwan nak kuu nlaaz Diox tsow goo, tak nteed goo ley, tsa ne goo naa kwan nak re kuu wen kuu ndoblo goo tsow goo. 19 Ndak goo tak loo goo xnet Diox lo re zha kuu nak taxal syeg, ne ndak goo tak goo teni goo lo re zha kuu nzi lo yalkow. 20 Ne ndak goo tak loo goo kuu wen lo re zha kuu nayeze yek lo xkiiz Diox, noga ndak goo tak loo goo xkiiz Diox lo re zha kuu gagt xkiiz Diox, tak nap goo ley kuu mndaa Diox lo goo, ne tak lo xkiiz Diox nke re yalnzaak ne re kuu wli. 21 Os lee goo nteteed goo tedib net men. ¿Chebee nteteedt goo leeka goo? Mbez goo ndoblot lowann men, ne ¿chebee nlowann goo tsa? 22 Mbez goo ndoblot gak rop men kon tedib zha kuu nagt tsaal men. Ne ¿chebee ntsow gooy? Ne mbez goo nayii goo ne goo re diox kuu nagt Diox, ne ¿chebee nlowann goo re kuu nzo leen gwodoo? 23 Kwathoz ndrub goo, tak goo nak kuu mkayaa ley lo Diox, per tak nzont goo kuu nzhab lo ley, kona ntsow ntsow nataagt goo Diox. 24 Taxal nzhab lo xkiiz Diox: “Re zha kuu nagt zha Israel ntsow nataagt zha Diox por re goo”. [Is. 52:5]

25 Nataak seny chaan re zha Israel lo goo, os nzont goo diiz kuu nzhab lo ley kuu mndaa Diox lo Moisés, per os nzont goo diize, nak goo taxal zha kuu nket seny. 26 Ne os lee zha kuu nket seny chaan re zha Israel, nzont zha diiz re kuu nabee ley; zha’a nak taxal zha kuu nke seny, tegal nkete zha. 27 Kona lee zha kuu nket seny, per nzont zha diiz kuu nzhab lo ley, zha’a naab kwent lo zha kuu nzont diiz kuu nzhab lo ley, tegal nap zha ley ne tegal nke seny chaan re nee zha Israel. 28 Tak lee re zha kuu wlipaa nak zha raz Israel, nagte re zha

kuu ngol lo re zha Israel, ne re zha kuu wlipaa nke seny nagte re zha kuu nke seny. ²⁹ Sinke lee re zha kuu wlipaa nak zha Israel, re zha'a nak re zha kuu wen ndo lo Diox; ne lee re zha kuu wlipaa nke seny, re zha'a nak re zha kuu nke seny chaan Diox leen leettsoo; ne Mbi Nayon chaan Diox nak kuu ntsow kona nagte ley, kona nataagt kuu ntsow re men xgab, kuu nataak nak wen nzo leettsoo Diox ne Diox re zha.

3

¹ ¿Kwan ntsow nee gan tak nak nee zha Israel? Ne ¿pa nataak nke seny nee? ² Nataake tak lo re nee mndaa Diox xkiiz Diox. ³ Wene, ¿per kwan gak os lee thib re tawlaz nee yelaazt raa Diox? ¿Chu kona tsow laa Diox ne gagt raa Diox nali lo nee? ⁴ ¡Nagte tata! Thibka ntsow Diox kuu ni Diox, tegal reta men nak zha kuu nkedi; tak lo xkeets Diox nzhab:

Diox reta men ne, nali naka lo re kuu ni'a, ne os cho naab kwent lo'a, lu tsow gan. [Sal. 52:4]

⁵ Per os por re kuu went kuu ntsowaa, nloo lee Diox nali nak, ¿kwan gabaa? ¿Chu went nak Diox kona nayii Diox leettsa ntsowaa kuu went, ne nte ti Diox re'aa? (Per tak men na kona tabaa mbez'n.)

⁶ ¡Nagte tata! Tak os lee Diox nalit nak Diox, ¿Xomod naab Diox kwent lo reta men yezlyu ree?

⁷ Per os por nkedin, kona ntsow nloo kuu wli chaan Diox, ne os por nkedin ntsow nataak zha Diox ¿Chebee bee naab Diox kwent lon taxal lo zha kuu ndab falt? ⁸ Os tatay, tak gabaa. “Tsowaa kuu went tsa loo kuu wen”, taxal nlooz zha nee ni zha lee nee tabaa nloo nee, per wlipaa teteti Diox re zha kuu tata nak.

Retalee nakaa zha kuu ndab falt

⁹ ¿Kwan ntsow goo xgab? ¿Chu ndak goo mas nataak nee nake tedib net re men? ¡Nagte tata! Taxal mkee'a na, lee Diox naab kwent lo reta men, lo re zha Israel ne lo re zha kuu nagt zha Israel, tak reta zha zha ndab falt nak zha. ¹⁰ Taxal nke lo xkeets Diox:

¡Thitanax neeka thib zha nali yent!

¡Neeka thib zha!

¹¹ Neeka thib zha nyente, neeka thib zha nkwaant Diox.

¹² Reta zha mlaa zha Diox, reta zha mzhen net went, lalka ngok re zha myaan bxen zha.

¡Yent neeka thib zha kuu ntsow kuu wen!

¡Neeka mase thib zha! [Sal. 14:1-3]

¹³ Lee yeer yen zha nak taxal roo baa kuu ndezhaal,

Kon loz zha nkedi zha. [Sal. 5:9]

Lee re diiz kuu ndediz zha, nak taxal nit kwaan kuu ndroo xann keley mbeel. [Sal. 140:3]

¹⁴ Ne kon roo zha ngode zha re men, ne leeka kon roo zha ni zha re diiz nayan lo re men. [Sal. 10:7]

¹⁵ Ne kon rop nii zha nda zha lijer par kuth zha taben zha.

¹⁶ Reta ta nda zha ntsow zha ngyo re men ne ntsow zha ndriid re men yalti.

¹⁷ Net zha kuu wen kwint re men. [Is. 59:7-8]

¹⁸ Ne thitanax nzebt zha ne zha Diox. [Sal. 36:1]

¹⁹ Ne ne'a lee, lee reta kuu nzhab lo ley chaan Diox, lo re zha kuu nyelaaz ley lo re zha'a ni ley. Kona neeka thib re zha'a gagt gab zha, net zha naa kwan nak falt, leettsa naab Diox kwent lo reta

men. ²⁰ Gagt gakaa zha wen lo Diox, anta por nyelaazaa ley. Tak por lee ley ne'aa re kuu went ne por lee ley ne'aa nakaa zha kuu ndab falt.

Tsow zha gan yalnaban tak nyelaaz zha Jesucrist

²¹ Per lee nal laa'aa ley thib lad, tak mloo'a Diox naa xomod nali to'aa lo Diox, ne leeka ley ne re profet kuu ngoo ndala mndaa kwent naa xomod ndoblo nali to'aa lo Diox. ²² Nakaa zha nali lo Diox, tak nyelaazaa Jesucrist ne por Jesucrist reta men tak gak zha nali lo Diox, tak lalta nak reta men lo Diox. ²³ Reta men mtsow kuu went, ne ndoblot zha ndya zha lo Diox. ²⁴ Per por yalwen chaan Diox kayaa Diox re'aa, taxal zha nali ne mtelaa Diox re'aa, por kuu mtsow Jesucrist. ²⁵ Mlaa Diox nguth Jesucrist delant lo re men por retalee, leettsa mxo Jesucrist ren por lee, tsa wen kwinaa kon Diox tak nyelaazaa nguth Jesucrist; ne mloo Diox wlipaa nke leettsoo Diox re'aa, kona mxek leettsoo Diox mne Diox re'aa lo reta kuu went kuu mtsowaa ndala, ²⁶ tsa ne re men nal tyemp ree lee Diox wlipaa nali nak, ne tsa ne re men lee Diox kayaa men, taxal zha nali tak nyelaaz men Jesucrist.

²⁷ Kona, ¿plo nyaan yalbrub chaan re men lo Diox? ¡Mluzhe! Tak gakt gak zha zha nali lo Diox, tak nzhon zha kuu nzhab lo ley chaan Moisés; sinke tak nyelaaz zha Jesucrist, kona nak zha zha nali lo Diox. ²⁸ Kuu yelo nin lo goo nak, nkib Diox falt zha, tsa gak zha zha nali lo Diox, tak nyelaaz zha Jesucrist, ne nagte, tak nzhon zha diiz kuu nzhab lo ley. ²⁹ ¿Chu anta Diox re zha Israel nak Diox? ¿Chu nagt Diox, Diox reta zha kuu nagt zha Israel? Wlipaa lee Diox nak Diox chaan reta men

kuu nzi dita lo yezlyu, ³⁰ tak thibka Diox nzo; ne lee Diox kayaa re zha taxal zha nali tak nyelaaz zha Jesús, tegal nke seny re zha Israel zha o nkete zha. ³¹ Kona, ¿kwan ntsow goo xgab? ¿Chu ntsow nataagtaa ley tak nyelaazaa Jesucrist? ¡Nagte tata! Sinke tata mod nloo'aa nataaka ley.

4

¹ Kona, ¿kwan mtsow Abraham gan ley lo'aa?
² Os nali mndo Abraham lo Diox, tak mbin Abraham diiz taxal nzhab lo ley, ngok galey Abraham, per ndoblot galey Abraham lo Diox. ³ Tak lo xkiiz Diox nzhab: “Tak ngwalaaz Abraham Diox, kona mkayaa Diox Abraham taxal thib zha nali”. [Gn. 15:6] ⁴ Tak os lee thib zha kuu nke tsiin, lee temi kuu ntsow zha gan nagte thib kuu tabaata ndelaaz patron zha lo zha, leey nak thib kuu mtsow zha gan, tak mke zha tsiin. ⁵ Ne lee zha kuu mtsowt neeka thib kuu, per nyelaaz zha lee Diox ntsow nali re zha kuu ndab falt, tekayaa Diox zha taxal zha nali, tak nyelaaz zha Diox. ⁶ Kona noga rey David nzhab, kwathoz wen nda re zha kuu kayaa Diox zha taxal zha nali tegal kwan mtsow zha.
⁷ Nzhab David:
 Kwathoz wen nda re zha kuu mtuuy Diox re falte; kwathoz wen nda re zha kuu thitanax mtelaazt raa Diox re kuu went kuu mtsow zha.
⁸ ¡Kwathoz wen nda re zha kuu naabt Diox kwent lo! [Sal. 32:1-2]

⁹ ¿Kwan ntsow goo xgab? ¿Chu beeta re nee kuu nke seny, ndoblo nee kayaa nee yalwen ree o chu noga re zha kuu nagt zha Israel kuu nket seny? Tak ni'a na: “Tak ngwalaaz Abraham Diox, kona mkayaa Diox Abraham taxal zha nali”. [Gn. 15:6]

¹⁰ Per, ¿pol mkayaa Diox Abraham taxal zha nali? ¿Chu leettsa mke'a Abraham seny o leettsa terka ke seny Abraham? Wli leettsa terka ke seny Abraham mkayaa Diox Abraham taxal zha nali, ne nagte leettsa mke Abraham seny. ¹¹ Diox mndaa seny lo Abraham, tak senya mlloo lee Abraham nali ngok lo Diox, tak ngwalaaz Abraham Diox. Ne lee Abraham ngwalaaz Diox, leettsa terka ke seny Abraham, kona lee Abraham nak xut reta zha kuu nyelaaz Diox, tegal nket seny zha. Ne nkayaa Diox re zha taxal zha nali, tak nyelaaz zha Diox, taxal ngwalaaz Abraham Diox. ¹² Ne noga nak Abraham xut reta zha kuu nke seny, os lee zha nyelaaz zha Diox taxal ngwalaaz Abraham Diox, leettsa terka ke seny Abraham.

Kuu nataak nak yelaazaa Diox taxal ngwalaaz Abraham Diox

¹³ Lee Diox nzhab lo Abraham ne lo re zha kuu nak raz Abraham, lee Diox taa yezlyu lo re zha. Per nzhabt Diox taa Diox yezlyu lo re zha, tak mbin Abraham diiz lo ley, sinke tata nzhab Diox, tak ngwalaaz Abraham Diox; ne mkayaa Diox Abraham taxal zha nali. ¹⁴ Per os beeta re zha kuu nzhon diiz kuu nzhab lo ley kayaa kuu nzhab Diox, nlortsint nyelaazaa Diox tsa, ne lee xkiiz Diox nataagt raa tsa. ¹⁵ Tak lee ley ndyaadno yalnayii chaan Diox, tak gagt gon men diize; per ta yent ley gagt keki zha thib men, ne gab zha lee men nzhont diiz.

¹⁶ Kona lee diiz kuu nzhab Diox lo Abraham ne lo re zha raz Abraham, noga mndaa Dioxhe lo'aa, zha kuu nyelaaz Jesús. Ne nagte beeta lo re zha kuu nzhon diiz lo ley, sinke noga lo retalee

mndaa Diozhe, tak nyelaazaa Diox taxal ngwalaaz Abraham Diox. Ne tata mod lee Abraham nak xutaa. ¹⁷ Taxal nzhab lo xkeets Diox: “Mton lu tsa gaka xut kwathoz men re yez kuu nzi lo yezlyu”. [Gn. 17:5] Diox kuu ngwalaaz Abraham nzhab koree lo Abraham, Diox kuu ndaa yalnaban lo re zha nguth, Diox kuu ndexkwaa re kuu yent, ne beeta kon xkiiz Diox ntsow Diozhe. ¹⁸ Tak kona nzhab Diox lo Abraham: “Kwathoz men gak raz chaana”. [Gn. 15:5] Per tegal ngogt gagak diiz kuu nzhab Diox lo Abraham tsyaka, tak ngooxa Abraham tsya, per thib ngwalaaz Abraham Diox ne mlet Abraham mkayaa Abraham kuu nzhab Diox lo Abraham, ne kona ngok Abraham: “Xut kwathoz men re yez”. ¹⁹ Neeka lut ngogt chop xgab Abraham, tegal napa Abraham teeka thib gayoo liin tsya; ne tegal mera gath rop tsaalta Abraham tsya ne tegal gagt gap tsaal Abraham mbet. ²⁰ Tegal tatay, thib ngoo yek Abraham, lee Diox tsow kuu nzhab Diox lo Abraham. Ney mndo Abraham ngwalaaz Abraham Diox ne mbil Abraham lo Diox. ²¹ Ne wen wen ne Abraham lee Diox nap yalney, par tsow Diox kuu nzhab Diox. ²² Kona mkayaa Diox Abraham taxal zha nali, tak ngwalaaz Abraham Diox.

²³ Ne leetssa ndaa xkeets Diox kwent, lee Diox mkayaa Abraham taxal zha nali, mkete beeta por Abraham; ²⁴ noga mkey por re zha kuu nyelaaz Diox kuu mteroban Jesucrist, Zha Nabee lo’aa, kona no’aa tekayaa Diox re’aa taxal zha nali, ²⁵ tak lee Jesucrist nguth por reta faltaa, ne mroban Jesucrist tsa kayaa Diox re’aa taxal zha nali.

5

Tak nyelaazaa Jesucrist kona ngok nambi'aa lo re faltaa

¹ Lee nal, tekayaa Diox re'aa taxal zha nali tak nyelaazaa Jesucrist, ne wen nzi'aa kon Diox por kuu mtsow Jesucrist. ² Ne tak nyelaazaa Jesucrist kona mndaa Diox yalwen ree lo'aa, ne nali nzi'aa lo yalwen ree, ne lazaa ngebetaa yo'aa kon Diox lo xni chaan Diox. ³ Ne nagte beeta koree, noga lazaa leetssa ndriidaa yalti; tak ne'aa leetssa ndriidaa yalti masraa nxekaa. ⁴ Ne leetssa nxekaa masraa ney ndo'aa lo Diox, ne leetssa ney ndo'aa nyelaazaa Diox, thib nzo yekaa ngebetaa kuu taa Diox. ⁵ Ne leetssa ngebetaa kuu taa Diox, wlipaa tekayaa re leey. Tak nzo yalnkelaaaz chaan Diox leettsoo'aa; yalnkelaaaz kuu mndaa Diox lo'aa por Mbi Nayon chaan Diox kuu mndaa Diox lo'aa.

⁶ Tak leetssa ngogt gato'aa nali leeka lee'aa lo Diox, tsa myaad Crist Kuu Mtaal Diox Nabee nguth por reta men kuu nalit ndo lo Diox, ne mer wiz kuu mli Diox myaad Jesucrist. ⁷ Wlipaa na nin, kwathoz nagan taa thib zha diiz gath zha por tedib zha, tegal por thib zha kuu kwathoz wen nake. Per ser nzo cho zha teye leettsoo zha, taa zha zha gath zha por thib zha kuu kwathoz wen nak. ⁸ Per mlou Diox yalnkelaaaz chaan Diox lo'aa, ne tegal zha ndab falt nakaa lo Diox, lee Jesucrist nguth por reta lee. ⁹ Ne lee nal nambi re'aa lo re faltaa, tak lee Jesucrist nguth por lee ne mtelaa Jesucrist re'aa lo yalnayii chaan Diox. ¹⁰ Ndala mtsowaa kuu went kuu nlaazt Diox; ne mtsow Diox wen mrinaa kon Diox leetssa nguth Xgann

Diox; ne os mtsow Diox wen mrinaa kon Diox por Xgann Diox tegal mtsowaa re kuu went, wlipaa tekeno'aa yalnaban kuu thitanax. ¹¹ Ne nagte beeta koree, noga kwathoz naley nzo leetsoo'aa, tak wen nzi'aa kon Diox, por kuu mtsow Jesucrist Zha Nabee lo'aa.

Kuu mtsow Adán ne kuu mtsow Jesucrist

¹² Por thibka zha mndaab falt lo yezlyu ree, ne por falta mndaab yalguth lo yezlyu, kona reta men nzath, tak reta men ndaa falt. ¹³ Leetssa terka taa Diox ley lo Moisés, nzo'a falt lo yezlyu; per gagt keki zha thib zha leetssa yent ley. ¹⁴ Ne tegal tatay, desde wiz kuu mban Adán ne asta wiz kuu mban Moisés, reta men nguth, tegal mndaat zha falt taxal mndaa Adán falt, per reta men mdiinne ne lo reta men mriid kuu mtsow Adán, leeka tata lo reta men mriid kuu mtsow Jesucrist kuu myaad bluz.

¹⁵ Per lee falt chaan Adán nagte taxal kuu nataak kuu ndelaaz Diox lo'aa. Tak os por falt chaan thibka mbyi mtsow kwathoz zha nguth. Masraa nataak yalnaban kuu tabaata ndelaaz Diox lo'aa, por thibka mbyi kuu le Jesucrist, ne ndaa Diozhe lo kwathoz men. ¹⁶ Yegwalt nak falt kuu mtsow thibka mbyi, kon kuu nataak kuu ndelaaz Diox lo'aa, tak beeta por falt chaan thibka mbyi nzath reta men, per lee kuu ndelaaz Diox lo'aa, ntsow kwathoz falt chaan re men yuyy, tsa kayaa Diox zha taxal zha nali. ¹⁷ Tak os por falt chaan thibka mbyi mzin yalguth lo reta men, leeka tata wlipaa taban re zha kuu nyelaaz Jesucrist, re zha kuu mtsow nali Diox por yalwen chaan Diox.

¹⁸ Kona por falt Adán nzhath reta men; leeka tata por kuu wen kuu mtsow Jesucrist, tekayaa Diox re zha taxal zha nali, tsa keno zha yalnaban.

¹⁹ Leeka taxal mbint thibka mbyi diiz lo Diox, kona reta men ndaa falt, leeka tata por thibka mbyi kuu mbin diiz lo Diox, kona retalee tekayaa Diox taxal zha nali.

²⁰ Diox mndaa ley par mloo ley naa xomod nak re falt; per leetssa mloo naa xomod nak re falt, masraa mloo Diox yalwen chaan Diox lo reta men.

²¹ Leeka taxal por falt ngoo yalguth, tataka por yalwen chaan Diox mtsow Diox nakaa zha nali lo Diox, tsa keno'aa yalnaban por Jesucrist Zha Nabee lo'aa.

6

Lo falt nakaa taxal zha nguth per kon Jesucrist nabanaa

¹ Kona, ¿kwan ntsow goo xgab? ¿Chu bee tataaka lee falt, tsa masraa loo Diox yalwen chaan Diox?

² ¿Thitanax ndoblot gake tata! Tak lee'aa nakaa taxal zha kuu nguth lo re falt; kona ndoblot raa taa'aa falt tedib welt.

³ ¿Chu net goo, leetssa ngokleyyaa, thibka ngokaa kon Jesucrist leetssa nguth Jesucrist? ⁴ Tak leetssa ngokleyyaa, leey nak mod nguthaa ne mgaatsaa, tsa banaa lo thib yalnaban kub; leeka taxal mgaats Jesucrist leetssa nguth Jesucrist ne mteroban Diox Jesucrist kon yalney chaan Diox.

⁵ Os lee'aa thibka nguthaa kon Jesucrist, leeka tata robanaa taxal mroban Jesucrist. ⁶ Ne ne'a re'aa lee zha went kuu ngokaa ndala, mke'a lo kruz kon Jesucrist, par mluux zha kuu went kuu

ngokaa, kona nabeet raa falt lo'aa nal. ⁷ Tak lee zha kuu ngutha gagt raa taa zha falt. ⁸ Ne os lee'aa ngutha lee kon Jesucrist, noga ne'a lee tabanaa kon Jesucrist, ⁹ ne ne'a re'aa lee Jesucrist mroban, ne thitanax gatht raa Jesucrist; ne thitanax nabeet raa yalguth lo Jesucrist. ¹⁰ Thibka welt nguth Jesucrist por re falt chaan re men, ne naban Jesucrist ne ntsow Jesucrist kuu nlaaz Diox. ¹¹ Leeka tata no'aa ndoblo gakaa taxal zha nguth lo re faltaa, per ndoblo gakaa zha kuu naban lo Diox, tak thibka nakaa kon Jesucrist.

¹² Taat raa lee diiz nabee falt lo kwerpaa, par tsowaa kuu went kuu nlaaz kwerp. ¹³ Ne neeka taataa kwerpaa par tsowaa kuu went. Mas wen taa'aa ditalee lo Diox, tsa tsow lee kuu nlaaz Diox, tak lee Diox mterobanaa. ¹⁴ Ne ndoblote raa nabee falt lo'aa par tsowaa re kuu went, tak nzhontaa diiz lo ley sinke lee'aa nzhon diiz lo Diox, tak mloo Diox yalwen chaan Diox lo'aa.

Lee nal nakaa zha kuu nke tsiin lo Diox

¹⁵ Mbay, ¿kwan ntsow goo xgab? ¿Chu tak tsowaa kuu went, tak nabeet raa ley chaan Moisés lo'aa, ne tak mloo Diox yalwen chaan Diox lo'aa? ¿Ndoblote! ¹⁶ Ne wen ne goo, tak kwii'aa zha kuu nabee lo'aa, tsa gonaa diiz lo zha'a, ne tsa ke'aa tsiin lo zha. Os lee'aa kwii'aa ke'aa tsiin lo kuu went tsa gathaa, o kwii'aa ke'aa tsiin lo Diox ne gonaa diiz lo Diox, tsa gakaa zha nali lo Diox. ¹⁷ Lee nal texkix Diox tak kon dib ndroo leettsoo'aa ngetsowaa re kuu wen kuu mteedaa lo Diox, tegal ndala ngokaa mos lo kuu went. ¹⁸ Nal nagt raa lee mos lo kuu went. Lee nal nakaa zha kuu ntsow kuu nali nak. ¹⁹ Taxal men ndediz'n,

tsa wen yen goo koree, tak men yezlyu ree nakaa. Leeka taxal mke goo tsiin lo kuu went ndala ne mtsow goo kuu went, leeka tata btaa goo dita goo par tsow goo kuu nali, tsa nambi to goo lo Diox.

²⁰ Leetssa mke'aa tsiin lo kuu went, neeka lut mtsowtaa xgab tsowaa kuu nali nak. ²¹ Per, ¿kwan mtsowaa gan lo re kuu wenta? ¡Yentka kwan! Anta nthoyaa ne'aa re kona nal. Tak kona ndano'aa lo yalguth. ²² Per lee nal, tak nabeet raa re kuu went lo'aa; lee nal nke'aa tsiin lo Diox, ne mtembi'aa Diox re'aa ne kuu mtsowaa gan nak yalnaban kuu taa Diox lo'aa. ²³ Lee kuu tsowaa gan lo kuu went nak yalguth, per lee kuu mndelaaz Diox lo'aa nak yalnaban kuu thitanax, por Jesucrist Zha Nabee lo'aa.

7

Nabeet raa ley lo'aa nal

¹ Re goo wets'n ne btan na, reta goo nlebee goo ley. Ne noga ne goo lee ley nabee lo men, beeta leetssa naban men lo yezlyu ree. ² Leey nak taxal leetssa lee thib ngot mtseya, lo ley ndoblo ngot gon ngot diiz lo tsaal ngot lo dita naban tsaal ngot. Per os gath tsaal ngot, tsaraa tak tseya ngot kon tedib mbyi. ³ Per os lee ngot gak rop ngot kon tedib mbyi leetssa bee nabanka tsaal ngot, ndaa ngot thib falt. Per os lee tsaal ngot ngutha, tak tseya ngot kon tedib mbyi ne nagt kona kuu went.

⁴ Tataka nake re goo wets'n ne btan na, ndala lee ley chaan Diox mnabee lo'aa; per leetssa nguth Jesucrist noga re'aa nguthaa; tsa nabeet raa ley lo'aa. Lee nal tak nakaa zha Jesucrist kuu mroban, tak tsowaa kuu wen kuu nlaaz Diox. ⁵ Tak leetssa

mbanaa taxal nlaaz kwerpaa, lee ley mtsow masraa ngoo yekaa mtsowaa kuu went kuu nlaaz kwerpaa, ne mndenoy lee lo yalguth. ⁶ Per lee nal, ngutha lee lo ley kuu mnabee lo'aa ndala, ley kuu mkee zha lo yeets; lee nal ndoblo tsowaa rtsin Diox, kon thib yalnaban kuu kub, ne Mbi Nayon chaan Diox ntsow koree leettsoo'aa.

Falt kuu nzo leen kwerp da

⁷ Kona, ¿kwan ntsow goo xgab? ¿Chu ley ntsow ntsowaa kuu went? ¡Nagte tata! Per net'n naa kwan nak falt os yent ley. Ne thitanax ganet'n naa kwan nak yaltablaaz, os gakete lo ley: “Tablaazta chaan tabena”. [Ex. 20:17; Dt. 5:21] ⁸ Per lee falt mtsow masraa ngoo yaltablaaz leettsoon, tak lo ley nzhab wente. Tak os lee zha net zha naa kwan nabee ley, gagt nabee falt lo zha. ⁹ Ne leettsa ter nen naa kwan nabee ley, ndak'n wen nak'n, per leettsa mlebeen ley, tsa myeen na leen nak'n zha kuu masraa ndab falt, ¹⁰ ne ndoblon gath'n. Diox mndaa ley, tsa por re kuu nabee ley tsow'n gan yalnaban, per lee ley mlOO lon ndoblo gath'n. ¹¹ Kona lee falt mkwaan mod mkedin lo re kuu nabee ley, kona ndoblo gath'n.

¹² Wen nak ley chaan Diox; ne nali nak re diiz kuu nabee Diox kuu nke lo ley. ¹³ Per nit'n lee kuu wen mtsow ndoblo gath'n. ¡Nagte tata! Sinke lee falt mtsow ngok went re kuu wen, ne mkedi falt'n, kona ndoblon gath'n por re falt da. ¡Kona thitanax went nak falt!

¹⁴ Ne'a lee Diox nak kuu mndaa ley, per lee na nak'n thib men yezlyu ree, kona thibka nabee falt lon par tsow'n kuu went. ¹⁵ Net'n kwan ntsow'n, tak ntsowt'n kuu wen kuu nlaz'n, leel re kuu

went kuu nayiin nen, kona ntsow'n. ¹⁶ Ne leettsa ntsow'n re kuu went kuu nlazt'n tsow'n, tsa nyeen na lee ley nak kuu wen. ¹⁷ Kona nin nagt na kuu ntsow re kuu went, sinke falt kuu nzo lo kwerp da nak kuu ntsowe. ¹⁸ Ne nen neeka thib kuu wen yent leen kwerp da, tak kuu lo yezlyu ree nake; nlaz'n tsow'n kuu wen per gagt tsow nay. ¹⁹ Ntsowt'n kuu wen kuu nlaz'n tsow'n, leel kuu went kuu nlazt'n tsow'n, kona ntsow'n. ²⁰ Per os leen ntsow'n re kuu nlazt'n tsow'n, nagt na cho ntsowe, sinke re falt kuu nzo lo kwerp da ntsowe.

²¹ Kona, leettsa nlaz'n tsow'n kuu wen, leel kuu went ntsow'n. ²² Leen leettsoon nyow leettsoon ley chaan Diox, ²³ per nyeen na, lee leen kwerp da nzo thib kuu ngyo kon re xgab da kuu wen. Ne naliib'n lo kuu nzo leen kwerp da, taxal thib zha kuu nzo tsib.

²⁴ ¡Prob'n! ¿Cho tak telaan lo re kuu went kuu ntsow kwerp da? Tak koree ntsow ndoblon gath'n. ²⁵ Kona ndan textkix lo Diox por Jesucrist Zha Nabee lo'aa, tak beeta lee Jesucrist tak telaan lo re kuu went; kona kon xgab da ntsow'n kuu nabee ley chaan Diox, per lee kwerp da ntsow kuu went.

8

Mbi Nayon ndaa yalnaban

¹ Per lee nal, tetit Diox re zha kuu thibka nak kon Jesucrist, re zha kuu ntsowt kuu nlaaz kwerp, re zha kuu naban taxal nlaaz Mbi Nayon. ² Lee Mbi Nayon chaan Diox kuu ndaa yalnaban kuu kub lo'aa, mlou'aa lo re faltaa ne lo yalguth por Jesucrist. ³ Tak ngogt ley kuu mndaa Diox lo Moisés

gatelaa re men lo re kuu went, tak xegt zha tsow zha re kuu nabee ley. Kona mtaal Diox Xgann Diox, taxal thib men kuu ndaa falt, par nguth Xgann Diox por retalee, ne tabaa mod mluux Diox yalnabee chaan falt. ⁴ Mtsow Diox koree, tsa tak tsowaa re kuu wen kuu nabee ley, tak nabant raa lee taxal nlaaz kwerp, tak lee'aa naban taxal nlaaz Mbi Nayon.

⁵ Tak lee re zha kuu ntsow kuu nlaaz kwerp, beeta re kuu yezlyu ree ntsow zha xgab; per lee re zha kuu ntsow kuu nlaaz Mbi Nayon, beeta re kuu nak chaan Mbi Nayon ntsow zha xgab. ⁶ Lee re zha kuu ntsow xgab beeta re kuu yezlyu ree, lo yalguth ndano re kona zha, per lee re zha kuu ntsow kuu nlaaz Mbi Nayon, lo yalnaban ndanoy zha, ne wen yo zha. ⁷ Lee re zha kuu ngwii beeta lo re kuu yezlyu ree nayii zha'a ne Diox, tak nlaazt zha ne neeka gagt tsow zha kuu nabee Diox. ⁸ Kona lee re zha kuu ntsow re kuu nlaaz kwerp, went nzo leettsoo Diox ne Diox re zha'a.

⁹ Per lee'aa nabant raa lee taxal nlaaz kwerpaa, lee'aa naban taxal nlaaz Mbi Nayon, os lee'aa wlipaa napaa Mbi Nayon chaan Diox leettsoo'aa. Per lee zha kuu napt Mbi Nayon chaan Jesucrist leettsoo, nagt zha'a zha Jesucrist. ¹⁰ Per os nzo Jesucrist leettsoo'aa, tegal nguth kwerpaa por re faltaa, per lee xbi'aa nabanka, tak lee Diox mtsowa nakaa zha nali. ¹¹ Ne os lee Mbi Nayon chaan Diox kuu mteroban Jesucrist nzo leettsoo'aa, leeka Diox taa yalnaban kuu kub lo kwerpaa, beeta kon Mbi Nayon chaan Diox kuu nzo leettsoo'aa.

¹² Kona, re goo wets'n ne btan na, nzo thib kuu

ndoblo tsowaa, per nagte par tsowaa kuu nlaaz kwerpaa. ¹³ Tak os lee'aa tsowaa re kuu nlaaz kwerpaa tathaa, per os por Mbi Nayon chaan Diox kuu nzo leen leettoo'aa, tsowaa par tsowt lee kuu nlaaz kwerpaa, tekeno'aa yalnaban kuu thitanax.

¹⁴ Tak lee Mbi Nayon nloo xnet Diox lo re zha kuu nak zhiinn Diox. ¹⁵ Ne lee Mbi Nayon kuu mkayaa'aa, nagte kuu ntsow tsa tsebaa tedib welt, sinke lee Mbi Nayon ntsow, nakaa zhiinn Diox ne kona "Pa" ni'aa lo Diox. ¹⁶ Ne lee Mbi Nayon chaan Diox mbez lo xbi'aa, lee'aa nak zhiinn Diox. ¹⁷ Ne tak zhiinn Diox nakaa, ndoblo kayaa'aa re chaan Diox kuu ne Diox taa Diox lo'aa, ne kon Xgann Diox Jesucrist kayaa leey; os lee'aa ndriidaa yalti kon Jesucrist, tsa bluz kwinaa lo xni chaan Jesucrist.

Kuu yaad bluz

¹⁸ Kuu nin nak lee yalti kuu ndriidaa nal, neeka lut yewalte nake kon kuu thoz kuu loo Diox lo'aa bluz. ¹⁹ Tak reta kuu mdexkwaa Diox ngebet, naa polor loo Diox re zha kuu nak zhiinn Diox. ²⁰ Reta kuu mdexkwaa Diox ndaktiy ne ngeluzhe. Per ngogt rey tata, tak tata ngwalaaz rey, sinke Diox nzhab tata gake. Kona noga re kuu mdexkwaa Diox ngebet, ²¹ naa pol ridt raay yalti ne luxt raay, ne gake kuu nataak taxal re zhiinn Diox. ²² Ne ne'aa, lee re kuu mdexkwaa Diox kwathoz ndriide yalti asta nal, ne lee yalne chaane nak taxal yalnlaaz chaan thib ngot kuu ngeyal zhiinn. ²³ Ne nagt beeta re kuu mdexkwaa Diox ngeriid yalti, noga lee, zha kuu nap Mbi Nayon chaan Diox leettoo, Mbi Nayon kuu mbez lo'aa naa

kwan kayaa'aa lo Diox. Ne noga lee ngeriidaa yalti leettsoo'aa ne ngebetaa wiz kuu thitanax gakaa zhiinn Diox, ne tsee Diox kwerpaa, tsa gake thib kuu thitanax luxt raa ne ridt raay yalti. ²⁴ Mtsowaa gan yalnaban, tak ngebetaa kuu taa Diox lo'aa. Per os lee'aa ngebetaa kuu nloo'a lo'aa, nagt kona kuu ngebetaa, tak nloo leey lo'aa ne ndechet kwettaay. ²⁵ Per os lee kuu ngebetaa nloote lo'aa, ndoblo xekaa kwettaay. ²⁶ Ne lee Mbi Nayon ntsow ayudaa par naabaa lo Diox, tak gagtaa naabaa lo Diox taxal ndobloy. Ne leeka Mbi Nayon naab lo Diox kwent chaanaa kon diiz kuu gagt ni men. ²⁷ Per Diox kuu nlebee leettsoo reta men, ne'a naa kwan nlaaz Mbi Nayon naab, tak lee Mbi Nayon naab lo Diox taxal nlaaz Diox por re zha kuu nali ne nambi ndo lo Diox.

Thitanax layaat Diox re'aa

²⁸ Ne ne'a re'aa lee Diox ntsow, tsa reta kwaa wen ndroo lo re zha kuu nke leettsoo Diox, re zha kuu mrez Diox taxal nlaaz Diox. ²⁹ Ne ndala mlebee Diox re'aa, ne mli Diox re'aa, tsa gakaa taxal Xgann Diox, tsa lee Xgann Diox gak zha kuu mas nataak lo re'aa, ne gak zha wetsaa ne btanaa. ³⁰ Ne lee re zha kuu mli Diox ndala, noga mrez Diox zha, ne lee re zha kuu mrez Diox, mtsow nali Diox zha ne taa Diox diiz kwinn zha lo xni chaan Diox.

³¹ ¿Kwan ntsow goo xgab lo re koree? ¡Os lee Diox nzo faboraa, neeka thib zha gagt tsow gan lo'aa!

³² Ne mkat Diox Xgann Diox, kona mndaa Diox Xgann Diox nguth por reta faltaa, kona wlipaa thibka taa Diox reta kwaa lo'aa ne lo Xgann Diox.

³³ ¡Neeka thib zha gagt keki re zha kuu mli Diox!

Tak lee Diox mtsow nali zha. ³⁴ Ne neeka thib zha gagt keki re zha kuu mli Diox, tak lee Jesucrist nguth por re faltaa, ne mroban Jesucrist ne lee nal ndob Jesucrist lad ban lo Diox, ne ngenaab Jesucrist lo Diox por lee. ³⁵ Neeka thib kuu gagt tsow, tsa ket raa leettsoo Jesucrist re'aa. Neeka re yalti, neeka re yalne kuu ndriidaa, neeka tegal nkwaan zha lee par kuth zha lee, neeka win, ne tegal yent lar gokaa, ne tegal tak kuth zha lee.

³⁶ Taxal nzhab lo xkeets Diox:

Diox, por lu gandata wiz nzo ryez gath nee,
ne ntsowno zha nee,

taxal mbak zhiil kuu ndano zha par kuth zha. [Sal. 44:22]

³⁷ Per yent kwan takaa lo reta koree, tetsowaa gan por Jesucrist, tak nke leettsoo Jesucrist re'aa.

³⁸ Ne wen nen, neeka thib kuu gagt tsow, tsa ket raa leettsoo Diox re'aa:

neeka yalguth,

neeka yalnaban,

neeka re mandad chaan Diox,

neeka yalney chaan re mbi fyer,

neeka re kuu nzo nal,

neeka re kuu yaad bluz,

³⁹ neeka ta kwathoz ya ndab,

neeka ta mas naats,

ne neeka thib re kuu mdexkwaa Diox.

Neeka thib re koree gagt tsow, tsa ket raa leettsoo Diox re'aa, tak mloo Diox mke leettsoo Diox re'aa, leettsa mtaal Diox Jesucrist, Zha Nabee lo re'aa.

9

Diox mli re zha Israel

¹ Ne wlin kuu nin nkedit'n tak zha Jesús nak'n, ne lee Mbi Nayon chaan Jesús kuu nzo leettsoon ndaa kwent wli kuu nin. ² Kwathoz nabil nzo leettsoon, ne asta nzhogwe leettsoon, leettsa ntelaz'n re tawlaz'n zha Israel. ³ Nlaz'n, os tak lan Jesucrist ne ndyan gabil por re tawlaz'n, tsa tsow zha gan yalnaban kuu thitanax. ⁴ Diox mli nee tsa gak nee zhiinn Diox, mndo Diox lo nee kon xni thoz chaan Diox, lo re nee ne Diox re diiz kuu ndoblo gon nee diiz, lo nee mndaa Diox ley, ne noga mndaa Diox diiz gol nee lo Diox, ne ne Diox taa Diox narooob kwaa lo nee. ⁵ Lo re tey nee zha ndala, mndelo raz chaan nee, ne lo raz nee ngol Jesucrist, leettsa myaad Jesucrist ngok men, ne lee Jesucrist nak Diox kuu nabee lo reta kwaa. ¡Texkix Diox, kwathoz wen nak Diox! ¡Tata gake!

⁶ Ne nagt lee xkiiz Diox mrolot, tak ret zha kuu nak zha raz Israel, nak zha kuu wlipaa nak zha Israel. ⁷ Ne ret zha kuu nak zha raz chaan Abraham, nak zha kuu wlipaa nak zha raz Abraham, tak Diox nzhab lo Abraham: "Lee re zha kuu gak zha raza, asta lo Isaac telo tsow men kwent zha". [Gn. 21:12] ⁸ Ne koree nak, ret zha kuu nak raz chaan Abraham nak zhiinn Diox. Sinke re zha kuu wlipaa nak zhiinn Diox, nak re zha kuu mndaa Diox xkiiz Diox lo. ⁹ Tak koree nak kuu nzhab Diox lo Abraham: "Tedib liin bretab'n, tsa lee tsaala Sara gap thib mbet". [Gn. 18:10]

¹⁰ Per nagte beeta koree. Sinke noga leettsa ngop Rebeca mbet, kwach ngop Rebeca ne Isaac ngok xut rop mbet. ¹¹⁻¹³ Ne leettsa terka gal rop mbet, ne leettsa terka tsow rop zha neeka thib kwaa, neeka kuu wene ne neeka kuu wente, lee Diox nzhab lo Rebeca: "Lee zha kuu gal ner gak

mos lo zha kuu gal bluz”. [Gn. 25:23] Ne koree ngok taxal nzhab lo xkeets Diox: “Kwathoz mke leettsoon Kob ne kwathoz mnayiin mnen Esaú”. [Mal. 1:2-3] Tata ngoke, tsa ne’aa lee Diox mbi Diox zha taxal nlaaz Diox. Ne re zha kuu mbi Diox, mbez Diox zha ne ngwiit Diox naa kwan mtsow zha.

¹⁴ ¿Kwan ntsow goo xgab? ¿Chu ntsow goo xgab nalit nak Diox? ¡Nagte tata! ¹⁵ Tak lee Diox nzhab lo Moisés: “Kwathoz nke leettsoon re zha kuu nlaz’n ke leettsoon, ne nlat leettsoon nen re zha kuu nlaz’n lat leettsoon nen”. [Ex. 33:19] ¹⁶ Kona nagt men zhiinn Diox tak nlaaz men, ne neeka nagt men zhiinn Diox por re kuu ntsow men, lee men nak zhiinn Diox tak nlat leettsoo Diox ne Diox men. ¹⁷ Tak lo xkeets Diox nzhab lee Diox nzhab lo rey Egipto: “Mton lu par gaka rey, tsa por lu ne re men kuu nzo dita lo yezlyu, leen tak tsow reta kwaa, ne tsa yath len dita lo yezlyu”. [Ex. 9:16] ¹⁸ Kona nlat leettsoo Diox ne Diox re zha kuu nlaaz Diox, ne noga ntsow nad Diox leettsoo re zha kuu nlaaz Diox.

¹⁹ Per lee re goo cha ne goo: “Os leey tatay, ¿chebee nkeki Diox re men? ¿Chu nzo cho nkez ntsowt kuu nlaaz Diox?” ²⁰ Per lee goo men yezlyu ree nak goo, ne ¿cho nak goo par kab roo goo lo Diox? ¿Chu tak gab yet lo zha kuu mdexkwaa yet? “¿Chebee tenzhee mdexkwaa’a na?” ²¹ Lee zha kuu ndexkwaa yet, tak tsow zha loka kuu nlaaz zha kon bena; kon leeka bena, tak tsow zha thib yet chul kuu kwathoz wen, ne kon leeka bena tak texkwaa zha tedib kuu plotta nak.

²² Diox nak taxal zha kuu ndexkwaa yet. Kwathoz nxek leettsoo Diox ne Diox re zha kuu

nyelaazt Diox, re zha kuu ndo'a lux, tsa loo Diox yalnayii chaan Diox, ne tsa loo Diox lee Diox tak tsow reta kwaa. ²³ Ne noga ngwalaaz Diox loo Diox re yalnaro chaan xni thoz chaan Diox, lo re zha kuu mlat leettsoo Diox mne Diox, re zha kuu mli Diox desde ndala. ²⁴ Ne Diox mrez re nee, zha kuu nak zha Israel ne noga re goo zha kuu nagt zha Israel. ²⁵ Taxal nzhab lo yeets kuu mkee profet Oseas:

Re zha kuu nagt zha da, gak zha da,
ne re zha kuu mket leettsoon, ke leettsoon. [Os. 2:23]

²⁶ Ne ta nzhab Diox lo re zha: “Nagt goo zha da”.
Tya gab Diox lo re zha: “Goo nak zhiinn Diox kuu naban”. [Os. 1:10]

²⁷ Noga Isaí mndaa kwent chaan Israel ne mkee Isaí: “Tegal kwathoz re zha raz Israel taxal gux kuu nzi roo nitdoo, per lotta zha tsow gan laa lo yalguth. ²⁸ Tak mera naab Diox kwent lo re men kuu nzi dita lo yezlyu.” [Is. 10:22-23] ²⁹ Ne leeka Isaí mkee, ne nzhab:

Os lee Diox kuu nak Zha Nabee gatant razaa,
wlipaa lee'aa gayaan taxal rop yez kuu nak
Sodoma ne Gomorra. [Is. 1:9]

Xomod nali to men lo Diox

³⁰ ¿Kwan ntsow goo xgab? Lee re zha kuu nagt zha Israel nkwaant zha nali to zha lo Diox, per tegal tatay tekayaa Diox zha taxal zha nali tak nyelaaz zha Diox. ³¹ Per lee re zha kuu nak zha Israel, ngwalaaz zha gatsow zha reta kuu nzhab lo ley, tsa nali to zha lo Diox, per mtsowt zha gan gagon zha diiz kuu nzhab lo ley. ³² ¿Chebee, mtsowt zha gane? Mtsowt zha gane, tak ngwalaazt zha

Diox par nali to zha lo Diox, sinke nda leettsoo zha, gakayaa Diox zha taxal zha nali por re kuu ntsow zha. Kona mral “ke kuu ndral nii re men ni zha”.

³³Taxal nzhab lo xkeets Diox:

Nal tob’n thib ke yek yii Sión,

lee ke’a nak taxal thib ke naro kuu ral nii re men.

Ne loka zha kuu yelaaz ke’a,

neeka mas thoyt zha. [Is. 28:16]

10

¹ Re goo wets’n ne btan na, lee kuu kwathoz nlaz’n ne naab’n lo Diox nak, tsow re tawlaz’n zha Israel gan yalnaban kuu thitanax. ² Ne nzon fabor zha, tak nen kwathoz nlaaz zha tsow zha tsiin lo Diox, per ntsowt zhay taxal ndobloy, tak nlebeet zha kuu wlipaa. ³ Ne net zha naa xomod ntsow nali Diox men lo Diox; leel mtsow zha re kuu nlaaz zha par nali to zha lo Diox, ne tak tata mtsow zha kona mbint zha diiz nali gato zha lo Diox, ⁴ tak Jesucrist mtsow reta kuu mbez lo ley, tsa loka zha kuu yelaaz Jesucrist tsow zha gan gak zha, zha nali lo Diox.

⁵ Loka zha kuu nlaaz nali to lo Diox, tak nlaaz zha tsow zha kuu nzhab lo ley kuu mndaa Diox lo Moisés, ndoblo tsow zha re kuu nzhabe, tak tenzhee mkee Moisés: “Loka zha kuu gon diiz reta kuu nzhab lo ley, taban zha”. [Lv. 18:5] ⁶ Per lee zha kuu nali ndo lo Diox, nyelaaz zha Diox. Kona ndoblot ta leettsoo zha gab zha: “¿Cho tsow gan kendab yibaa? Koree nak nlache zha Crist lo yezlyu; ⁷ o ¿cho la leen yeerdoo? Koree nak teroban zha Jesucrist xid re zha nguth.” ⁸ Kona lee xkeets Diox nzhab: “Gax lo’a ndo Diiz Chul chaan

Diox, gax roo'a ne gax leettsoo'a ndoy". [Dt. 30:12-14] Koree nak Diiz Chul kuu ndaa nee kwent. ⁹ Tak os lee'a kon roo'a gaba lee Jesucrist nak Zha Nabee, ne kon leettsoo'a nyelaaza lee Jesús mroban xid re zha nguth, tetsowa gan yalnaban kuu thitanax. ¹⁰ Tak kon leettsoo men nyelaaz men lee Diox mteroban Jesucrist, kona nak men zha nali lo Diox, ne kon roo men ndoblo ni men lee Jesucrist nak Zha Nabee, tsa tsow men gan yalnaban kuu thitanax.

¹¹ Tak lo xkeets Diox nzhab: "Reta zha kuu yelaaz Jesucrist, thoyt zha ne zha Diox". [Is. 28:16]

¹² Tak lo Diox lalka nak re zha Israel kon re zha kuu nagt zha Israel. Tak lee Diox nak Zha Nabee lo reta zha, ne wen nak Diox lo reta zha kuu naabe lo Diox. ¹³ Tak tenzhee nzhab lo xkeets Diox: "Reta zha kuu mbez Zha Nabee, tetsow zha gan yalnaban kuu thitanax". [Joél 2:32] ¹⁴ Ne ¿xomod tak tediz zha lo Diox, os lee zha nyelaazt zha Diox? ¿Ne xomod yelaaz zha Diox os ter gon zha xkiiz Diox? ¿Ne xomod gon zha xkiiz Diox, os yent cho taa kwente lo zha? ¹⁵ ¿Ne xomod taa zha kwent Diiz Chul lo tedib zha, os yent cho taal zha? Taxal nzhab lo xkeets Diox: "¡Kwathoz wen nak leettsa ndyaad thib zha kuu ndaa kwent Diiz Chul chaan Zha Nabee!" [Is. 52:7]

¹⁶ Per ret men ndaa yek gon Diiz Chul. Taxal mkee Isaí lo xkeets Diox: "Zha Nabee, ¿neeka thib zha ngwalaazt xkiza kuu mndaa nee kwent?" [Is. 53:1] ¹⁷ Kona neeka thib men gagt yelaaz Jesucrist, os yent cho taa kwent chaan Jesucrist lo zha.

¹⁸ Ne ¿kwan ntsow goo xgab? ¿Chu mbint re men xkiiz Diox? ¡Wlipaa mbin zhay! Tak lo xkeets Diox

nzhab Diox:

Reta zha kuu nzi lo yezlyu mbin xkiiz Diox kuu
mndaa re zha kwent,

asta ta mas tith lo yezlyu mbin zhay. [Sal. 19:4]

¹⁹ Noga naabdiz'n lo goo, ¿kwan ntsow goo xgab?
¿Chu myent re tawlaz'n zha Israel koree? Wlipaa
myen zhay, tak ner Moisés mndaa kwent xkiiz
Diox, ta nzhab Diox:

Na tsow gak celos goo, leettsa wii goo naa xa
nkenap'n tedib net re zha kuu nagt zha yez
ree;

ne tsow'n tsa yii goo ne goo tedib net re zha,
kuu nlaazt yene. [Dt. 32:21]

²⁰ Noga mkee Isaí kuu nzhab Diox:

Lee re zha kuu mkwaant'n, mzal'n lo zha;
ne lee re zha kuu mnaabdizt na, mlebee zha'a na.
[Is. 65:1]

²¹ Ne Isaí mndaa kwent chaan re zha Israel ne
nzhab Isaí: “Dita wiz mtab'n yaan ne mrez'n goo,
per mndaat goo yek goo gagon goo diiz xkiz'n ne
mlaa goo na”. [Is. 65:2]

11

Mlaayat Diox re zha Israel

¹ Kona naabdiz'n: ¿Chu thitanax mlaa Diox re
tawlaz'n zha Israel? ¡Wlipaa mlaayaat Diox zha!
Tak non zha Israel nak'n, raz chaan Abraham
nak'n, ne lo raz chaan Benjamín ngol'n. ² Ne desde
ndala, mli Diox re tawlaz'n tsa gak zha, zha Diox;
ne mlaayaat Diox zha. ¿Chu net goo xa nzhab lo
xkiiz Diox kuu mkee profet Lí? Leettsa mkeki Lí
re zha Israel lo Diox, ne nzhab Lí: ³ “Zha Nabee,
mbeth zha re profeta, ne mluux zha re bkoog
kuu nak chaana, ta ndaa re men maa gon lo'a.

Ne beeta na myaan, per noga na nlaaz zha kuth zha.” [1 Rey. 19:10,14] ⁴ Per lee Diox mkab lo zha, ne nzhab: “Myaant thita lu, noga nap’n gaz mil mbyi kuu mtobxubt lo diox Baal, kuu nagt Diox”. [1 Rey. 19:18] ⁵ Ne leeka tata nake nal, nzo tyen tawlaz’n kuu nak zha Diox, kuu mli Diox por yalnkelaaaz chaan Diox. ⁶ Ne os por yalnkelaaaz Diox mtsow Diox koree, nagtraay por kuu wen kuu ntsow men; ne os gagake por kuu wen kuu ntsow men, nagtraay kuu mndelaaz Diox tabaata.

⁷ Kuu nlaz’n nin nak, mzalt re tawlaz’n kuu mkwaan re tawlaz’n. Per tegal tatay lee tedib net re zha kuu mli Diox, mzale lo zha; per lee tedib net re tawlaz’n, ngok nad leettsoo. ⁸ Taxal nzhab lo xkeets Diox: “Diox mtsow ngok nad leettsoo zha, ne tataka nak zha asta wiz naltseree. Tegal ngwii zha ne nzhon zha re kuu mtsow Diox, per myent zha re kuu nzhab Diox.” [Dt. 29:4; Is. 29:10] ⁹ Ne noga David nzhab:

Leeka re ani kuu ntsow zha gak kwa ne yex ta la zha,
ne gake ke kuu ral nii zha tsa rid zha yalti.

¹⁰ Nlaz’n kow lo re zha tsa gagt raa wii zha,
ne thitanax leng dits zha reta wiz kuu naban zha.
[Sal. 69:22-23]

Lee yalnaban noga nake par re zha kuu nagt zha Israel

¹¹ Lee nal nin: ¿Chu mral nii re zha Israel ne ngob zha, tsa yechet raa zha thitanax? ¡Nagte tata! Tak mbint re zha Israel diiz lo Diox, kona mkayaa tedib net re zha kuu nagt zha Israel yalnaban kuu thitatax, ne kona mtsow nzhak celos re zha Israel.

¹² Ne tak mbint re tawlaz’n zha Israel diiz lo Diox,

tak mlaa zha Diox, kona ngok tsa mkayaa re zha kuu nagt zha Israel re kuu wen thoz kuu ndelaaz Diox; ne masraa kuu kayaa re zha kuu nagt zha Israel, leetsta lee re tawlaz'n gon diiz lo Diox.

¹³ Ne lee nal nin lo re goo zha kuu nagt zha Israel, tak lo re goo mtaal Diox'n ne kwathoz ntsow nataak na rtsin na, ¹⁴ tak nlaz'n gak celos re tawlaz'n, leetsta ne zha xa nkayaa Diox goo, tabaa nlaz'n tsow'n tsa tsow thib net re tawlaz'n gan yalnaban kuu thitanax. ¹⁵ Ne os por mlaa re tawlaz'n Diox, kona wen mrin re men kuu nzi dita lo yezlyu kon Diox. ¿Kwan ntsow goo xgab? ¿Kwanpaa gak leetsta kayaa Diox re tawlaz'n tedib welt? ¡Wlipaa lee zha gak taxal zha kuu mroban xid re zha nguth! ¹⁶ Ne os chaan Diox nak pan kuu ner mdexkwaa, noga dita koob kuu texkwaa reta pan nak chaan Diox. Ne os chaan Diox nak lozh ya, noga re zhit ya nak chaan Diox.

Kwent nanzee chaan ya olib

¹⁷ Nal tan thib kwent nanzee lo goo. Diox mx- een thib ya olib kuu wen, ne bluz mga Diox re zhite. Tsaraa mga Diox thib zhit ya olib wan, ne mkengiin Diox re zhit ya olib wana lo ya olib Diox. Reta nee zha Israel, nak taxal re zhit ya olib kuu wena, ne reta goo nak taxal re zhit ya olib kuu mkengiin Diox lo ya olib Diox. Koree nloo lee re goo nap goo re kuu wen chaan Diox kuu ndelaaz Diox lo nee. ¹⁸ Per leyt goo ne gab goo masraa wen goo nake re zhit kuu mga Diox. Btelaaz goo nagt goo kuu ntsow naban lozh ya, sinke lozh ya ntsow naban goo.

19 Ser nda leettsoo goo: “Mga Diox re zhita par mkengiin Diox nee lo ya olib kuu mxeen Diox”.
 20 Wliy; per btelaaz goo lee re zhit kuu mga Diox, nak re zha Israel kuu ngwalaazt Diox; ne lee re goo tak ngwalaaz goo Diox kona mkengiin Diox goo lo ya olib Diox. Kona ndoblot rub goo, mas wen ndoblo tseb goo. 21 Tak taxal mlatta leettsoo Diox mne Diox re zhit ya olib kuu mxeen Diox, leeka tata latta leettsoo Diox ne Diox goo. 22 Wii goo, xa wen nak Diox kwathoz nlat leettsoo Diox ne Diox re zha kuu nzhon diiz lo Diox. Per no Diox nayii Diox ne nlatta leettsoo Diox ne Diox re zha kuu nzhont diiz lo Diox. Kona ndoblo tsow goo kuu nlaaz Diox, tak os lee goo tsowt gooy no goo tega Diox goo taxal mga Diox re zhit ya Diox. 23 Per tegal tatay, os lee re tawlaz’n bre zha yelaaz zha Diox, tebre Diox kengiin Diox zha tedib welt; tak nap Diox yalnabee ne tak kengiin Diox zha tedib welt lo ya olib Diox. 24 Tak os mga Diox goo lo ya olib wan ne mkengiin Diox goo lo ya olib kuu mxeen Diox, jkona mas nagant kengiin Diox re tawlaz’n tedib welt lo ya olib kuu mxeen Diox, tak re zhita nak re zhit chaanpaa ya olib Diox!

Xomod tsow re zha Israel gan yalnaban kuu thitanax

25 Re goo wets’n ne btan na, nlaz’n ne goo kuu xgaats kuu tsow Diox, tsa leyt goo lee goo nzhaak; Diox mtsow ngok nad re tawlaz’n, asta leettsa yelo gak re zha kuu nagt zha Israel, zha Diox. 26 Ne leettsa yelo gak re zha kuu nagt zha Israel zha Diox, tsa lee re tawlaz’n zha Israel, tsow gan yalnaban kuu thitanax, taxal nzhab lo xkeets Diox:
 Yez Si6n roo zha kuu telaa’aa,

ne koo zha re zha raz Kob lo kuu went. [Is. 59:20]

²⁷ Ne trat ree nak kuu tsow'n kon re zha,

leettsa kib'n re falt zha. [Jer. 31:33-34]

²⁸ Tak mkayaat re tawlaz'n Diiz Chul chaan Diox, kona ngok zha, zha kuu nayii ne Diox. Tbaa mtsow Diox tsa lee re zha kuu nagt zha Israel, ngok mtsow gan yalnaban kuu thitanax. Per bee nkeka leettsoo Diox re tawlaz'n, tak lee Diox mli re tey nee zha ndala. ²⁹ Tak lee re kuu nataak kuu ndelaaz Diox, neeka mas kibt Dioxhe lo re zha kuu mrez Diox, par gak zha, zha Diox. ³⁰ Ne noga goo mbint goo diiz lo Diox ndala, per lee nal mlatta leettsoo Diox ne Diox goo, tak lee re tawlaz'n zha Israel, mbint zha diiz lo Diox. ³¹ Lee re tawlaz'n mbint zha diiz lo Diox, per koree ngok tsa mlat leettsoo Diox mne Diox re goo zha kuu nagt zha Israel; per tetsin wiz kuu lat leettsoo Diox ne Diox re tawlaz'n, zha Israel, taxal mlat leettsoo Diox mne Diox goo. ³² Ne mlaa Diox mbint reta men diiz lo Diox, tsa tak loo Diox nlat leettsoo Diox ne Diox reta men.

³³ ¡Kwathoz wen nak Diox! ¡Kwathoz naro nak yalnzhaak chaan Diox, lee Diox nlebee reta kwaa! Yent cho tak ne naa kwan tsow Diox, tak beeta lee Diox nzhaak reta kwaa, ne neeka gagt yelo yen men naa xomod nak xnet Diox. ³⁴ Tak yent neeka thib zha kuu nlebee xgab chaan Diox ne neeka yent cho mteni Diox. ³⁵ Yent cho zha mndaa thib kwaa lo Diox, par kwet zha kix Diox lo zha. ³⁶ Tak lee Diox nap reta kwaa, lee Diox mdexkwaay ne chaan Diox nak retay. ¡Kona thibka ndoblo golaa lo Diox reta wiz! ¡Tata gake!

12

Diox nlaaz nali banaa

¹ Kona nin lo re goo wets'n ne btan na, mlat leettsoo Diox mne Diox re'aa, kona ndoblo taa'aa dita lee lo Diox; taxal thib maa kuu nzhuth zha ne ndaa zha gon lo Diox. Koree nak thib gon kuu naban ne nambi kuu ndoblo taa'aa lo Diox, ne ndoblo golaa lo Diox kon kuu taa'aa lo Diox; tak koree nak kuu nyow leettsoo Diox. ² Ne ndoblot tsowaa re kuu ntsow re men yezlyu ree, sinke ndoblo laa'aa tsee Diox re xgabaa, tsa ne'aa naa kwan re kuu nlaaz Diox tsowaa, re kuu wen, re kuu nyow leettsoo Diox ne re kuu nali nak.

³ Ne lo yalnkelaaaz chaan Diox mtaal Diox'n par tsow tsiin ree, kona nin ne naab'n lo goo, neeka thib goo ndoblot tsow xgab, lee goo kwathoz nataak, sinke mas wen ndoblo kobee'aa re kuu tsowaa tak nyelaazaa Diox. ⁴ Leeka taxal nap kwerp men tyen ta, ne kadta thibe nape thib tsiin kuu ntsowe, ⁵ leeka tata kwathozaa, per thibka kwerp chaan Jesucrist nakaa, ne ndeche'aa thibaa ne tedibaa.

⁶ Ne lo yalwen chaan Diox, zhaa zhaa kuu nataak mndelaaz Diox lo thiba ne thibaa par tsowaa. Os lee Diox mndaa Diox diiz lo'aa gakaa profet re men, ndoblo tsowaay taxal nyelaazaa Diox. ⁷ Ne os lee Diox mndaa Diox lo'aa tsowaa ayud tedib net zha, ndoblo wen tsowaay. Ne os mndaa Diox lo'aa loo'aa xkiiz Diox lo tedib net zha, ndoblo tsowaay. ⁸ Loka cho zha mkayaa teni re wetsaa ne re btanaa, ndoblo tsow zhay thib mod wen, loka cho zha mkayaa talaaz thib kuu lo tedib zha, ndoblo tsow zhay kon dib ndroo leettsoo zha.

Loka cho zha mkayaa lo Diox nabee zha lo re zha Jesús, ndoblo nali tsow zhay, loka cho zha mkayaa lat leettsoo ne re zha kuu ndeche kwaa, ndoblo tsow zha ayud zha kuu ndeche kwaa, kon dib ndroo leettsoo zha.

Kuu ndoblo tsow re zha kuu nyelaaz Diox

⁹ Ndoblo ke leettsoo'aa thibaa ne tedibaa. Ndoblo laa'aa re kuu went, ndoblo teke'aa dits kuu wen. ¹⁰ Ndoblo tataka ke leettsoo'aa thibaa ne tedibaa re wetsaa ne re btanaa, ne ndoblo tsowaa xgab mas wen tedibaa nake lee'aa.

¹¹ Ndoblo ko'aa gan ke'aa tsiin lo Zha Nabee, ne ndoblot gakaa zha tsaab.

¹² Ndoblo naley yo leettsoo'aa, tak ndobke leettsoo'aa kuu ngebetaa; ndoblo xekaa leettsa ndriidaa yalti ne thibka ndoblo tedizaa ne naabaa lo Diox.

¹³ Ndoblo tsowaa ayud re wetsaa ne re btanaa, leettsa ndeche zha thib kwaa. Ne ndoblo'aa kayaa'aa re zha kuu tsin lizaa.

¹⁴ Ndoblo naabaa lo Diox por re zha kuu ndralno'aa; ne ndoblo naabaa kuu wen par lee zha, naabtaa tsa kode Diox zha.

¹⁵ Ndoblo naley yo leettsoo'aa kon re zha kuu naley nzo leettsoo, ndoblo gonnaa kon re zha kuu nzhonn.

¹⁶ Ndoblo wen yo'aa thibaa ne tedibaa. Ndoblot naro tsowaa, sinke ndoblo tsaal leettsoo'aa ne'aa re zha prob, ne ndoblot rubaa lee'aa nzhaak.

¹⁷ Os cho zha mtsow kuu went lo'aa, ndoblot leeka tata tsowaa lo zha. Ndoblo thibka yo yekaa tsowaa kuu wen lo reta men. ¹⁸ Ndoblo tsowaa tsa wen kwinaa kon reta men, asta plo take lo'aa.

¹⁹ Reta goo wets'n ne btan na kuu kwathoz nke

leettsoon, ndoblot tsowaa leeka kuu went lo zha kuu mtsow kuu went lo'aa, ndoblo laa'aa tsa lee Diox naab kwent lo zha'a; taxal nzhab lo xkeets Diox: "Na naab kwent lo zha, na yizh lo zha'a ne Zha Nabee". [Dt. 32:35] ²⁰ Por kona. "Os lee zha kuu nayii ne'a nlann, taa kuu wu zha, ne os nzheek leettsoo zha, taa kuu gu zha; tak leettsa ntsowa koree tsowa thoy zha ne tsowa kwib masraa ki dits zha". [Pr. 25:21-22] ²¹ Taataa diiz tsow kuu went gan lo'aa, sinke ndoblo tsowaa kuu wen, tsa tsowaa gan lo kuu went.

13

¹ Ndoblo gonaa diiz lo re zha kuu nak tsiin. Tak Diox mto zha ne mndaa Diox yalnabee lo zha, ne reta zha kuu nak tsiin, Diox mtsow ngok zha zha nak tsiin. ² Kona reta zha kuu nzehont diiz lo re zha kuu nak tsiin, lo Diox nzehont zha diiz, tak lee Diox mto re zha kuu nak tsiin; os nzehont zha diiz lo re zha kuu nak tsiin kuu mto Diox, ndaa zha falt ne kona teti Diox zha. ³ Tak mtot Diox re zha kuu nak tsiin, tsa tseb zha re zha kuu ntsow kuu wen, sinke mto Diox zha tsa tseb zha re zha kuu ntsow kuu went. Kona os lee'aa nlaazaa tsebtaa ne'aa re zha kuu nak tsiin, ndoblo tsowaa kuu wen, tsa ne zha wen nakaa, ⁴ tak mos Diox nak re zha kuu nak tsiin, tsa tsow zha ayudaa. Per os lee'aa ntsowtaa kuu wen, ndoblo tsebaa ne'aa re zha kuu nak tsiin, tak napt zha yalnabee tabaata, sinke nap zhay tsa teti zha re zha kuu ntsow kuu went, tak rtsin Diox ntsow zha. ⁵ Kona, ndoblo gonaa diiz lo re zha kuu nak tsiin, tsa tetit zha lee, sinke ndoblo tsowaay tak ngobee'aa, ne ne'a lee naa kwan ndoblo tsowaa. ⁶ Kona ndoblo kizhaa

kwent chaan yezlyu lo re zha kuu nak tsiin; tak mto Diox par tsow zha rtsin Diox.

⁷ Ne ndoblo taa'aa lo kadta zha kuu ndoblo zha. Ndoblo kizhaa reta kuu ndoblo'aa kizhaa lo re zha kuu nak tsiin; ne tataga ndoblo gabaa re diiz nataak lo re zha kuu ndobloy; ne ndoblo gonaa diiz lo re zha kuu ndobloy.

⁸ Neeka thib kuu ndoblot taabaa lo tedib zha. Sinke ndoblo ke leettsoo'aa thibaa ne tedibaa; tak loka zha kuu nke leettsoo taben, nzhon zha diiz reta kuu nzhab lo ley. ⁹ Tak lo ley kuu mndaa Diox lo Moisés nzhab:

Gakt rop goo kon zha kuu nagt tsaal goo,

kutht goo taben goo,

lowannt goo,

tablaazt goo chaan taben goo. [Ex. 20:13-17; Dt. 5:17-21]

Reta koree ne tedib net re kuu mnabee Diox lo ley, nak thibka koree: "Bke leettsoo goo taben goo leeka taxal nke leettsoo goo goo". [Lv. 19:18]

¹⁰ Loka zha kuu nke leettsoo taben tsowt zha neeka thib kuu went lo taben zha; kona os nke leettsoo zha taben zha mtsowa zha reta kuu nzhab lo ley.

¹¹ Ne re koree ndoblo tsowaa, tak ne'a lee xomod nak re wiz kuu nabanaa nal; ne mzina or kuu roo mkaal lo'aa, tak masraa ndetsin gaxa wiz kuu taa Diox yalnaban lo'aa; nake wiz kuu ngwalaazaa Diiz Chul chaan Diox. ¹² Tak kwathoz yaal, ne mera ndeyeni yezlyu; kona ndoblot raa tsowaa re kuu mtsowaa, leettsa mndo'aa lo yalkow, sinke ndoblo gokaa xabaa kuu nla xni, taxal thib soldad kuu lista ndo. ¹³ Kona ndoblo tsowaa re kuu wen kuu ntsow re zha kuu ndiy tse:

reta kwaa, nzhaw zhay ne ndaa zha texkix lo Zha Nabee, ne nzhon zha diiz lo Zha Nabee; ne noga zha kuu nzhawt reta kwaa, nzhawt zhay, per ndaa zha texkix lo Zha Nabee ne nzhon zha diiz lo Zha Nabee.

⁷ Tak neeka thibaa nabantaa par leeka lee'aa, ne neeka thibaa gadtaa tak nlaazaa. ⁸ Os lee'aa nabanaa, nabanaa par tsowaa rtsin Zha Nabee, ne os lee'aa gathaa, zha Zha Nabee nakaa. Kona os lee'aa nabanaa o gathaa zha Zha Nabee nakaa. ⁹ Tak par kona nguth Jesucrist ne mroban Jesucrist, tsa gak Jesucrist Zha Nabee lo re zha kuu naban ne lo re zha kuu ngutha.

¹⁰ Kona, ¿chebee nlooza wetsa ne btana? ne ¿chebee ndaka mas wena nake wetsa ne btana? tak retalee tetsinaa lo Diox, tsa naab Diox kwent lo'aa.

¹¹ Tak lo xkeets Diox nzhab:

Naban na, ne Zha Nabee,

ne lon tobxub reta men,

ne reta men ne leen nak Diox. [Is. 45:23]

¹² Kona kadta thibaa taa'aa kwent chaanaa lo Diox.

Tsowtaa par la re zha kuu nyelaaz Jesús lo kuu went

¹³ Kona ndoblot loozaa thibaa ne tedibaa. Sinke mas wen ndoblo'aa wii'aa naa kwan tsowaa, tsa tsowtaa la thib wetsaa o btanaa lo kuu went ne laa zha Diox. ¹⁴ Kwathoz wen mloo Jesucrist lon, neeka thib kwaa nagt kuu nambit, per os cho zha ndak nzo thib kuu nambit, lo zha nambit nake ne ndoblot zha wu zhay. ¹⁵ Per os kuu nzhawaa ntsow went nyoo leettsoo wetsaa o btanaa, lee kuu ngetsowaa nloo nket leettsoo'aa zha. Kona ndoblo wii'aa naa kwan re kuu dowaa, tsa tsowtaa

par laa thib zha Jesús, tak noga por lee zha nguth Jesús. ¹⁶ Ne taata diiz looz zha lee, os ngetsowaa kuu wen. ¹⁷ Tak leettsa nabee Diox leettsoo'aa, nataagt kuu nzhowaa neeka kuu nzhuu'aa, kuu nataak nak nali to'aa lo Diox, wen kwinaa ne naley yo leettsoo'aa, tak lee Mbi Nayon chaan Diox ndo kon lee. ¹⁸ Re zha kuu tenzhee ntsow tsiin ree lo Jesucrist, wen nzo leettsoo Diox ne Diox re zha'a, ne noga re men wen nzo leettsoo ne zha'a.

¹⁹ Kona ndoblo kwaanaa wen kwinaa; tsa tsowaa ayud thibaa ne tedibaa, tsa masraa ney to'aa lo Diox. ²⁰ Ndoblot luuzhaa rtsin Diox por kuu nzhowaa, reta kuu nzhow men nambiy, kuu went nak dowaa thib kuu tsow laa thibaa Diox. ²¹ Mas wen dowtaa beel, neeka gutaa xit ub, neeka tsowtaa thib kuu tsow par laa thibaa Diox. ²² Re kuu nyelaazaa lo kwent ree, ndoblo gake thib kuu lo'aa ne lo Diox. ¡Kwathoz wen nda re zha kuu ne ngetsow kuu wen! ²³ Per lee zha kuu nzhow thib kwaa kuu ndak zha went wu zha, ndaa zha falt, tak ndak zha went wu zhay ne nzhow zhay, ne noga reta kuu ntsowaa, os lee'aa ntsowaa xgab wente ne ntsowleey, ndaa'aa falt lo Diox.

15

Ndoblot tsowaa beeta kuu nyow leettsoo'aa

¹ Re'aa kuu ney ndo nyelaaz Diox, ndoblo'aa xekaa ne'aa re zha kuu neyt ndo nyelaaz Diox; ndoblot tsowaa beeta kuu ndakaa wen lo'aa. ² Ndoblo'aa tsowaa kuu wen kuu nyow leettsoo tabenaa, re kuu wen kuu tsow to ney zha lo Diox. ³ Tak neeka Jesucrist, mtsowt Jesucrist kuu myow leettsoo Jesucrist; sinke mtsow Jesucrist

taxal nzhab lo xkiiz Diox: “Reta diiz went kuu mni zha lo’a, lon mni zhay”. [Sal. 69:9] ⁴ Tak re kuu mke lo xkeets Diox ndala, mkey tsa teedaa; tsa xekaa ridaa re yalti, ne leekay tetsey leettsoo’aa, tsa kwettaa gak re kuu ne Diox gak lo’aa. ⁵ Ne nlaz’n lee Xutaa Diox kuu ntsow nxek leettsoo’aa ne ntetsey leettsoo’aa tsow ayud goo, tsa wen kwin goo kon re taben goo, taxal mloo Jesucrist, ⁶ tsa retalee kon thibka bos golaa lo Diox kuu nak Xut Jesucrist, Zha Nabee lo’aa.

Paba mndaa kwent Diiz Chul lo re zha kuu nagt zha Israel

⁷ Kona ndoblo wen kayaa’aa altaa’aa, leeka taxal mkayaa Jesucrist re’aa, tsa kwathoz men gol lo Diox. ⁸ Ne noga nin lo goo, lee Jesucrist myaad mlortsin lo re tawlaz’n, zha Israel, tsa ngok reta kuu nzhab Diox lo re tey nee zha ndala, ne myaad Jesucrist par mloo Jesucrist lee Diox ntsow Diox kuu ni Diox. ⁹ Noga myaad Jesucrist, tsa gol re zha kuu nagt zha Israel lo Diox, tak mlat leettsoo Diox mne Diox re zha, taxal nke lo xkeets Diox: Kona teth’n lu lo re zha kuu nzo dita lo yezlyu, ne gol’n lo’a. [2 Sam. 22:50; Sal. 18:49]

¹⁰ Noga nzhab lo xkeets Diox:

Naley bloo goo leettsoo goo, goo kuu nagt zha Israel ne thibka bil goo kon re zha Israel lo Diox. [Dt. 32:43]

¹¹ Ne lee tedib ta nzhab:

Reta goo, zha kuu nagt zha Israel bil goo lo Diox, ne reta men ndoblo taa kwent yalnzhaak chaan Diox. [Sal. 117:1]

¹² Ne noga Isaí mkee:

Lo raz chaan Isaí, xut David,

roo thib zha kuu nabee lo re men kuu nzo dita lo yezlyu,
ne lee re zha kuu nagt zha Israel kwet tsin zha. [Is. 11:10]

¹³ Nlaz'n lee Diox kuu taa kuu ngebetaa lo'aa, tsow tsa naley yo leettsoo goo ne tsow wen kwin goo, tak nyelaaz goo Diox, tsa por yalney chaan Mbi Nayon chaan Diox kuu nzo leettsoo'aa, kwet-taa kayaa'aa kuu ne Diox taa Diox lo'aa.

¹⁴ Reta goo wets'n ne btan na, wen nen kwathoz wen nak goo, ne nap goo yalnzhagak nyen goo re kuu, ne tak goo teni goo thib goo ne tedib goo.

¹⁵ Kona nzo ta mzebt'n ne mye leettsoon kwathoz nambi mkeen re kuu ndoblo nin lo goo, tsa thitanax nithlaazt gooy; tata mkeen lo yeets, tak por yalnkelaaaz chaan Diox mtaal Diox'n keen tsiin ree.

¹⁶ Diox'n mtaal'n tsa keen tsiin lo Jesucrist, lee tsiin ree nak tan kwent Diiz Chul lo re zha kuu nagt zha Israel. Tsa gak re zha kuu nagt zha Israel taxal thib gon kuu wen ne nambi lo Diox, ne Mbi Nayon ntsow kona.

¹⁷ Kona nley'n tak nyelaz'n Jesucrist ne por re tsiin kuu ngetsow'n lo Diox. ¹⁸ Tak yet leettsoon nin thib kuu mtsowt Jesucrist por na, sinke beeta re kuu mtsow Jesucrist por na kona nin, tsa lee re zha kuu nagt zha Israel gon zha diiz lo Diox, por re kuu nin ne por re kuu ntsow'n. ¹⁹ Ne por re kuu thoz kuu mtsow Diox kon yalney chaan Mbi Nayon chaan Diox lo re men. Tbaa mod tsa ngok mndan kwent Diiz Chul lo re men, mndelon desde Jerusalén ne mzin na asta yez Ilírico. ²⁰ Ne thib mlon yek'n tan kwent Diiz Chul, ta ter taa zha kwent chaan Jesucrist. Tak os leen tan kwente ta

mbina zhay, tsa nak'n taxal thib zha kuu taa thib yuu ta tedib zha mtob simyent, ²¹ taxal nzhab lo xkeets Diox:

Re zha kuu mnet naa cho nak Diox,
re zha'a lebee Diox;

ne re zha kuu mbint naa cho nak Diox,
re zha'a yen naa cho nak Diox. [Is. 52:15]

Paba mtsow xgab ya yez Roma

²² Kona tyen welt ngwalaz'n gayal'n lo re goo, per rtsin na mtetsan na kona terka yan. ²³ Lee nal ngwalo'a mtsow'n rtsin na reta yez ree; ne nda'a tyen liin nlaz'n yal'n lo re goo, ²⁴ kona leettsa yan Espany, tsa yal'n lo re goo, tak nlaz'n wiin goo ne nlaz'n tsow goo ayud'n par yan Espany. ²⁵ Per lee nal leen ya Jerusalén yataan thib gon lo re zha kuu nyelaaz Jesús kuu nzo tya, ²⁶ tak lee re zha kuu nyelaaz Jesús kuu nzo yezlyu Macedonia ne yezlyu Acaya, mroo leettsoo zha mndaa zha thib gon lo re zha prob kuu nyelaaz Jesús, kuu nzo yez Jerusalén. ²⁷ Ne kon dib ndroo leettsoo zha mtsow zhay, tak wlipaa ndab zha lo re tawlaz'n zha Israel, tak nee mndaa kwent Diiz Chul chaan Jesucrist lo re zha kuu nagt zha Israel, kona kon temi, ndoblo tsow zha ayud re zha Israel kuu nyelaaz Jesucrist. ²⁸ Per leettsa yelo tsow'n tsiin ree, leettsa yelo yatan na gon ree lo re tawlaz'n kuu nyelaaz Jesucrist; tsa roon tya ne riid'n lo re goo ne yan Espany. ²⁹ Ne wen nen leettsa yal'n lo re goo, kwaro re kuu wen tsow Jesucrist lo re'aa.

³⁰ Re goo wets'n ne btan na, por Jesucrist Zha Nabee lo'aa, ne por yalnkelaaaz kuu ndaa Mbi Nayon lo'aa, naab'n lo goo tsow goo ayud'n naab

goo lo Diox por na. ³¹ Naab goo lo Diox tsa yent kwan kuu went tak'n lo re zha kuu nyelaazt Jesús, re zha kuu nzo yezlyu Judea, tsa wen kayaa re zha Jerusalén kuu nyelaaz Jesús gon kuu ndatan na lo re zha. ³² Kona os lee Diox nlaaz, naley yo leettsoon tsin na lo goo, tsa tak roxkwan na lut leettsa yal'n lo re goo. ³³ Nlaz'n lee Diox kuu ntsow wen nzi'aa, kenap reta goo. ¡Tata gake!

16

Paba mni “diox” lo kadta thib zha

¹ Naab'n lo goo tsa wen kayaa goo btanaa Febe, tak lee zha nak zha kuu nke tsiin lo re zha kuu nyelaaz Jesucrist yez Cencrea. ² Wen bkayaa goo zha lo yalnkelaaZ chaan Zha Nabee, taxal ndoblo kayaa goo re zha Jesucrist. Ne btsow goo ayud zha loka kuu ndeche zha, tak kwathoz zha nda'a ntsow zha ayud, ne noga mtsow zha ayud'n.

³ Bni goo “diox” kwent chaan da lo Priscila ne lo Aquila tsaal priscila, rop zha nke tsiin kon na lo rtsin Jesucrist. ⁴ Ne asta mye leettsoo rop zha gagath zha, leettsa mer gagath'n, kona nagt thita na nda texkix lo rop zha, noga re wetsaa ne re btanaa kuu nagt zha Israel ndaa texkix lo rop zha. ⁵ Ne tataka bni goo “diox” lo reta zha kuu nyelaaz Jesucrist kuu nkaltaa liz Priscila rop Aquila. Noga bni goo “diox” lo amig da ne wets'n Epeneto kuu kwathoz nke leettsoon, tak lee zha ner ngwalaaz Jesucrist yezlyu Asia. ⁶ Noga bni goo “diox” kwent chaan da lo Mari kuu kwathoza nda wiz nke tsiin lo re goo. ⁷ Noga bni goo “diox” lo rop zha liz'n kuu nak wetsaa Andrónico ne wetsaa Junias, thibka ngoo rop zha tsib kon na. Ne wen nlebee re apóstl

chaan Jesucrist rop zha, ne ner rop zha ngwalaaz Jesucrist nake na.

⁸ Bni goo “diox” kwent chaan da lo amig da ne wets’n Ampliato kuu kwathoz nke leettsoon lo yalnkelaaaz chaan Zha Nabee. ⁹ Bni goo “diox” kwent chaan da lo wetsaa Urbano kuu thibka nke rop nee tsiin lo rtsin Jesucrist, ne noga lo wetsaa Estaquis kuu kwathoz nke leettsoon. ¹⁰ Bni goo “diox” kwent chaan da lo wetsaa Apeles, tak thibka nali ndo zha nyelaaz zha Jesucrist; ne noga lo re zha liz wets Aristóbulo. ¹¹ Bni goo “diox” kwent chaan da lo Herodión kuu nak zha liz’n, ne lo re zha Jesús kuu nak zha liz wets Narcis. ¹² Bni goo “diox” kwent chaan da lo btanaa Trifena ne lo btanaa Trifosa, rop zha kuu kwathoz nke tsiin lo Zha Nabee. Noga bni goo “diox” kwent chaan da lo btanaa Pérsida, tak kwathoz nke leettsoo re zha kuu nyelaaz Jesús zha, tak kwathoz mke zha rtsin Zha Nabee. ¹³ Bni goo “diox” kwent chaan da lo wetsaa Rufo kuu mli Diox; noga lo xnaa zha kuu nak taxal xnaan. ¹⁴ Bni goo “diox” kwent chaan da lo re wetsaa, Asíncrito, Flegonte, Hermas, Patrobas, Hermes ne noga lo reta wetsaa kuu nzi kon re zha ree. ¹⁵ Noga bni goo “diox” kwent chaan da lo wetsaa Filólogo, lo btanaa Jul, lo wetsaa Nereo ne lo btan Nereo, lo Olimpás ne lo reta zha kuu nyelaaz Jesucrist kuu nzi kon re zha.

¹⁶ Kadta thib goo bni goo “diox” lo reta wetsaa ne lo re btanaa, ne dow goo thib chut kwat kadta thib zha thib mod nali lo yalnkelaaaz chaan Diox. Ne noga reta zha kuu nyelaaz Jesucrist ni “diox” lo reta goo.

¹⁷ Reta goo wets’n ne btan na, naab’n lo goo

beche goo lo re zha kuu ntsow nzhak rol re zha kuu nyelaaz Jesús; re zha kuu ntsow nla re zha kuu nyelaaz Jesús lo kuu went, tak nloot zha taxal mloo Jesucrist. ¹⁸ Tak ntsowt re zha'a rtsin Jesucrist, sinke beeta nkwaan zha kuu nyow leettsoo kwerp zha, ne kon diiz naguuz nkedi zha re zha kuu neyt ndo nyelaaz Jesucrist. ¹⁹ Reta zha ne lee re goo nzhon diiz lo Diox; kona kwathoz laz'n ne konaga nlaz'n teed goo tsow goo reta kuu wen, per tsowt goo kuu went. ²⁰ Tsa lee Diox kuu ntsow wen nzi'aa, tsow tsa tsowaa gan lo Maxuuy. Ne lee Jesucrist, Zha Nabee lo'aa loo yalnkelaaaz chaan lo goo.

²¹ Noga Tim kuu nke rop nee tsiin, ni "diox" lo re goo. Noga Lus, Jasón ne Sosípater ni "diox" lo goo, re zha ree nak zha liz'n. ²² Lee na nak Tercio, na ngekee xkiiz Paba lo yeets ree, noga na nin "diox" lo re goo kon le Zha Nabee.

²³ Noga Gayo ni "diox" lo goo, liz Gayo nzon, ne leeka zha ntseche liz zha par nzhool nee lo Diox. Noga Erast ni "diox" lo re goo, lee zha nak tesorer yez ree, ne noga wetsaa Kwarto ni "diox" lo re goo. ²⁴ Nlaz'n thibka loo Jesucrist yalwen chaan Jesucrist lo reta goo. Tata gake.

Re diiz bluz kuu mbil Paba lo Diox

²⁵ Golaa lo Diox kuu tak tsow tsa ney to'aa lo Diox, taxal nak xkiiz Jesucrist kuu mndan kwent lo goo, kuu ngoo gaats ndala leettsa terka texkwaa Diox yezlyu. ²⁶ Per lee nal mloo Diox re kuu nzo yek Diox tsow Diox lo'aa, lo re yeets kuu mkee re profet Diox taxal mnabee Diox, Diox kuu naban

thitanax, tsa ne reta mene ne tsa yelaaz re men
Jesús ne gon zha diiz lo Diox.

²⁷ ¡Nlaz'n tsow nataak reta men Diox kuu nzhaak
reta kwaa, ne gol re men lo Diox por kuu wen kuu
mtsow Jesucrist!

¡Tbaa gake!

Paba

**Diiz kuu ndyaadno yalnaban
New Testament in Zapotec, Ozolotepec
(MX:zao:Zapotec, Ozolotepec)**

copyright © 2007 Wycliffe Bible Translators, Inc.

Language: Zapotec, Ozolotepec

Translation by: Wycliffe Bible Translators, Inc.

Zapoteco, Ozolotepec [zao], Mexico

Copyright Information

© 2007, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Ozolotepec

© 2007, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

cea57c17-4410-5b80-9d6c-b85ae95d5104